



Bentiarq Ottosen
Inatsisartunut ilaasortaq, Atassut

§ 37 naapertorlugu apeqqummut nr. 156/2026-mut akissut

Asasara Bentiarq Ottosen

Inatsisartut suleriaasianni § 37-mi, imm. 1 naapertorlugu Naalakkersuisunut apeqquteqarputit. Apeqqutit uannut akisassanngorlugit innersuussutigineqartut qujassutigaaakka.

Kalaallit Nunaanni Peqqinnissaqarfik suliatigut ilisimasat Nunatsinni Kigutileriveqarfimmit pissarsiani aallaavigalugit akissutitut ilassuteqarpoq.

Apeqqutit issuarneqartarput tamatumalu kingorna akineqarlutik.

- **Naalakkersuisut uppernarsarsinnaavaat Upernavimmi piffissami sivitsortumi aalajangersimasumik kigutit nakorsaannik atorfinitsitaqarsimanngitsoq? Taamaappat, atorfik qaqugumiit inuttalerneqassamaarpa?**

Akissut:

Kigutitut nakorsamik ataatsimik aalajangersimasumik Upernavimmi kigutileriffimmut ukiuni arlalinngortuni ukiumut pingasoriarluni suliaortoqartartoq taannalu nunap immikkoortuani tassani sivikitsumik tassa qaammatit pingasukkuutaapajaarlugit sulisartoq, Kalaallit Nunaanni Peqqinnissaqarfimmit ilisimatitsipput. Taamaammat tassa Upernavimmi kigutileriffik aalajangersimasumik atorfilimmik kigutitut nakorsaqqanngikkaluartoq tassani kigutitut nakorsaqqarniarneq aalaakkaavoq. Tassunga atorfinitsitsiniarneq sulissutigineqarpoq, qaqugorpiarli atorfinitsitsisoqarumaarnersoq Kalaallit Nunaanni Peqqinnissaqarfimmit oqaatigineqarsinnaanngikkallaruni.

- **Upernavimmi kigutileriffimmi maanna qanoq sulisoqarpa, atorfinnut immikkoortillugit qanoq sulisut amerlatigippat, atorfiillu sorliit inuttaqanngillat?**

Akissut:

Upernavimmi kigutileriffik kigutileriffimmi ikiortitut atorfilimmik ataatsimik maanna sulisoqarpoq. Kigutitut nakorsamik ataatsimik aalajangersimasumik kigutileriffimmut tassunga suliaortoqartarpoq, takuuk apeqqutip siulianut akissut. Kigutileriffimmi tassani kigutigissaasutut atorfik maannakkorpiaq inuttaqanngilaq, inuttalerneqarnissaalu Nunatsinni Kigutileriveqarfimmit sulissutigineqaleruttarluni. Tassani kigutigissaanermik suliaasat kigutigissaasumit nunap immikkoortuanit allameersumit

Ulloq: 25-08-2026
Suliap normua: 2026 - 14505
Allagaatip normua: 26741462

Postboks 1160
Oqarasuaat: 34 50 00
Fax: 34 55 05
3900 Nuuk
Emaili: pn@naoq.gl
www.naalakkersuisut.gl

isumagineqartassapput, kigutigissaasumik atorfinitsitsisoqarnissaata tungaanut. Aammattaaq kigutigissaanermi ikiortitut imaluunniit kigutileriffimmi ikiortitut atorfinittussarsiortoqaleruttorpoq.

- **Upernavimmi nunaqarfiinilu ataasiakkaani innuttaasut kigutileritinnissaminnut imaluunniit misissortinnissaminnut utaqqisut maanna qanoq amerlatigippat, meeqqat inersimasullu immikkoortillugit, agguaqatigiissillugulu qanoq sivisutigisumik utaqqisarpat?**

Akissut:

Upernavimmi nunaqarfiinilu meeqqat inuusuttullu kigutileritinnissamut utaqqisut pingasuupput misissorneqartussatullu utaqqisut arfineq-marluullutik. Tamatumani kisitsisit saqqummiussat, Nunatsinni Kigutileriveqarfiup nalunaarsugaataanni maanna pissarsiarineqarsinnaasuneersuupput.

Inersimasut kigutileritinnissamut misissortinnissamulluunniit utaqqisut qassiunnerannik agguaqatigiissillugulu qanoq sivisutigisumik utaqqisarnerannik misissuinissamut piffissaliussaq nallertinnagu misissoqqissaarneqarsinnaasimanngillat. Paasissutissat taakkununga tunngasut Nunatsinni Kigutileriveqarfiup nalunaarsugaataannit pissarsiarineqariaannaanngimmata pissarsiarisinnaajumallugit nammineq kisinnissaat pisariaqassasoq paasinarsivoq, § 37-li naapertorlugu matumani apeqqutip akinissaanut piffissaliussaq nallertinnagu taamaaliortoqariaannaasimanani.

- **Upernavimmi nunaqarfiinilu innuttaasut kigutigileritinnissaminnut maannakkut qanoq sullinneqarnissaat qulakkeerneqarpa, meeqqat inuusuttullu kiisalu piaartumik katsorsartariaqartut ilanngullugit?**

Akissut:

Upernavimmi kigutileritinnissamut neqeroorut kigutileriffiani sulisoqarnikkut taavalu Nunatsinni Kigutileriveqarfiup immikkoortortaqaarfiinit allaneersunit ikiuukkiartortoqartarneratigut attanneqarpoq.

Meeqqat inuusuttullu nunatsinni kigutigissaaneq pillugu inatsisit atuuttut naapertorlugit sallinneqarlutillu misissortinnissamut kigutileritinnissamullu ataqatigiissaakkamik aggersarneqartussaapput.

Nunatsinni Kigutileriveqarfimmiittaaq kigutilerinermut atortunik angallattagalisarluni nunap immikkoortuisa nunaqarfiinut kigutininik isumaginikkiaartortoqallattaartarpoq. Tamatumani misissuinerit, pitsaaliuinerit immikkullu toqqakkanik suliarinninnerit najukkani ataasiakkaani naammassineqartarput.

Erngertumik kigutileritinnissamik pisariaqartitsisut sallinneqarlunnarlutillu misissorneranni naliliinerit aallaavigalugit isumagineqartarput. Upernavimmi Peqqissaavik nunaqarfiinilu peqqissaavinni sulisut kigutimikkut qanermikkullu peqqissutsikkut ajornartorsiutilinnik kigutilerinermut taakkuninngalu malittareqqiinnermut tunngasuni suleqatigineqarputtaaq.

- **Naalakkersuisut Upernavik immikkoortuani kigutit nakorsaannik aalajangersimasumik atorfinitsitsinissaq kigutigissaasutigullu sullissinerup ataavartuunissaa qulakkeerniarlugit qanoq aalajangersimasunik suliniuteqarniarpat, suliniutillu qaqugu naammassineqarnissaat naatsorsuutigineqarpa?**

Akissut:

Kalaallit Nunaanni Peqqinnissaqarfik peqqinnissaqarfimmut sulisussarsiornermut tunngasuni akisussaasuullunilu, tamatumani aamma Upernavimmut, ataavartumik kigutitut nakorsassarsiuussisartuuvuq. Atorfinnut inuttassarsiuineri nunatsinni nunanilu tamalaani allagarsiinikkut kiisalu qinnuteqartuni piukkunnartunik oqaloqateqarnikkut pisarput. Ingerlatsinerup ataavartuunissaa qulakkeerniarlugu atorfiup pineqartup inuttassarsinissaata tungaanut atuuttussanik aaqqiissuteqarallarnikkut, tamatumani ajornanngippat kigutitut nakorsanik nunatsinnukarlutik sivikitsumik sulisussanik atorfinitsitsinikkut nunallu immikkoortuisa allat kigutiteriffiineersunik ikiuuttussarsinikkut qulakkeerneqartarpoq. Tamatumani suliniutit ulluinnarni ingerlatsinerup ilaatut ataavartumik ingerlanneqartarput, taamaammallu aalajangersimasumik atorfinitsitsinissaq qaqugorpiat pissanersoq oqaatigineqarsinnaanani.

- **Naalakkersuisut nunatsinni isorliunerusuni kigutit nakorsaannik patajaannerusumik sulisoqartitsinissaq qulakkeerniarlugu qanoq aalajangersimasunik suliniutinik aallartitsisimappat imaluunniit pilersaaruteqarpat, taakkulu qaqugu piviusunngortinneqassappat?**

Akissut:


Naalakkersuisut peqqinnissaqarfimmi ingerlatsinerup aalaakkaanerunissaa atajuartitsinermik tunngaveqarnerunissaa ataqatigiissarneqarnerunissaalu anguniarpaat. Taamaammatt Naalakkersuisut Inatsisartuni partiit tamarmik peqqissutsimut tunngatillugu annertusisamik isumaqatigiissusiornissaq pillugu oqaloqatigisarpaat. Kalaallit Nunaanni Peqqinnissaqarfimmi inerisaanerup paaseqatigiinnermik tunngaveqaqqullugu tamatumani siunissaq ungasinnerusoq eqqarsaatigalugu anguniakkap qinigaaffinni tamani aalaakkaasuuinnarsinnaaqqullugu, politikkikkut ingerlatsinermut tunngasutigut tunuliaqutsiilluarnissamut qulakkeerinninnissaq siunertaavoq.

Kigutissaanermik ilinniarsimasunik sulisussaaleqineq kigutiteriffinni sulisussaalequartuarsinnarnerup ajornartorsiutaaneranut pissutaalluinnarpoq. Kigutitut nakorsatut-, kigutigissaasutut- aamma kigutigissaanermi ikiortitut ilinniarsimasut Kalaallit Nunaannut attuumassutillit nunatsinni amigaataanerujussuat eqqaassagaanni ikippallaarput. Tamanna tamatumani sulisussarsiorniarnerup nunatsinni tamarmi ingammillu isorliunerusuni ajornartorsiutaaneramik kinguneqarpoq.

Kalaallit Nunaanni Peqqinnissaqarfik kigutigissaanermut tunngasutigut ilinniarsimasunik nunatsinnut, tamatumani aamma isorliunerusunut, sulisussarsiornermik sulisooreersunillu attassiniarnermik ataavartumik sulisuteqartuuvuq. Kigutiteritinnissamut neqeroorutip innuttaasunut tamanut atuutsissinnaaqqullugu tamatumani inuttassarsiuinerit ilaatigut nunatsinni nunanilu tamalaani allagarsiinikkut, sivikitsumik sulisussanik atorfinitsitsinikkut kiisalu kigutigissaanermut tunngasutigut ilinniarsimasutut nunap immikkoortuini sulisunik ikiuukkiartorsinnaasunik atorluannikkut

pisarput. Tamatumani suliniutit ulluinnarni ingerlatsinerup ilaatut ataavartumik
ingerlanneqartarput.

Inuulluaqqusillunga



Anna Wangenheim